

潮州府志 卷二十八

乾隆壬午重修

潮州府知府周碩勳輯

人物上

天之生人曾不擇地而山川精氣蘊釀鬱積必遲之久而後發抑又何歟潮自天水開風會之先卓犖英奇踵武相望雖出處殊趨顯晦異跡莫非樹績人群主持風教以逮方技縉羽輦輓者流其足供徵文考獻代不乏人也我

朝累洽重熙教化所漸濡者訖暨無外嶺服南離之方其光賁而有耀矣則紹往緒以啓將來可彬彬聲明文物之區哉志人物

名臣

宋

林從周海陽人景德二年進士授南安簿爲主計者所器使涖劍州銀冶擢大理評事筦權永嘉遷寺丞知考城縣王欽若出刺杭州奏辟爲副授太常博士通判軍州事伉直不阿尋入爲屯田員外郎轉開封府推官杜私謁不避權貴莊獻太后知其名奏事多所嘉納手詔褒之民有殺兄子以攘財者事覺坐法其人已死子以母老議留養從周日

使子無狀致戕兄刳財虐矣必無全理且縱奸不可孫雖幼足侍養太后可之卒配海外轉度支員外提點浙東西刑獄仁宗郊祀恩從周例廕一子念弟從善早世奏畀其子其後子弟食祿於朝者至二十餘人

王大寶字元龜海陽人建炎二年舉進士第二授南雄教授監登聞鼓院以祿不逮養移病歸奉祠祿趙鼎謫潮從講論語起知連州張浚謫連與其子栻講學浚還言連英循惠新恩六州居民纔數百非貿遷之地乞蠲免行錢報可改袁州進詩書易

解上稱其留意經術召除國子監司業兼崇正殿說書奏覈江南諸州月椿錢減折帛以惠民進直敷文閣知温州提點福建刑獄漳州有蔡岡叢薄蔽翳山石犖确盜乘間剽刳大寶募民挾藪堯道十餘里行者便之改廣東提刑初孝宗居潛邸大寶請聖斷擇可立者寵以王爵繫中外望高宗嘉納孝宗卽位除禮部侍郎大寶言致治先明國是今日和日戰浮議靡定陛下念祖宗積累之業痛河朔陷溺之民亟圖修攘斷而行之斯中興可冀也擢右諫議大夫首論朱倬沈該罪狀劾汪徹荆

襄敗衄疏再上謫徹台州遷大寶兵部侍郎力請
復張浚爲都督視師江淮迨符離失律羣言洶洶
命以敷文閣直學士提舉太平興國宮起居郎胡
銓奏曰王十朋王大寶相繼外謫非國之福詔留
之湯思退主和議請罷督府大寶又奏危疑之際
貴於果斷小却大勇斯可圖功今國事莫急於恢
復莫讎於金人乃以符離一敗遽罷邊防挫國威
而張敵勢竊爲陛下憂不聽連疏乞骸未幾金復
入犯上曰悔不用大寶言乾道元年召爲禮部尙
書入對言理財要在務本抑末右正言程叔達奏
大寶復免行錢非是罷歸尋遭疾疾革嘆曰恢復
之期無望矣卒年七十七著諫垣奏議六卷經筵
講義二卷遺文十五卷

潮州府志

卷二十八 人物 名臣 三

珠蘭書屋

元

陳士顯潮陽人少穎異博通羣書元初舉賢良方正
召對大廷正元間擢高第授國子監助教累遷集
賢直學士侍御史大德中流星日食之變士顯言
事過切直出爲江西道卒於官

明

蕭鑾字景和漳州籍祖詢知潮陽始家焉鑾少勤學

登宣德丁未進士拜行人使甘肅却哈密饋上知其廉擢監察御史勘大獄百餘人無顯狀鑾力爭之得未減出爲廣西提學坐族人事被逮尋復職補湖廣僉事時楊珏知黃州與衛鎮撫訐奏鑾按如律珏坐謫戍母憂服闋補福建僉事尋擢山西副使霍州守趙瑄故通政使也牟利害民上官多徇庇鑾獨劾奏瑄削籍士民稱快居二年乞歸

鄭安字康民海陽人弱冠以春秋鄉薦第一登景泰甲戌進士授監察御史糾彈不避權要成化初抗疏陳八事多見採用南畿星變疏請策勉大臣戒

飭在位言甚剴切尋遷陝西副使時番族龍駝等一十五族爲邊害巡撫檄安抵番界撫諭之皆詣軍門降有二族佯服尋叛去安設方畧討平之以南洮河及西北路諸要害爲番賊出沒之區皆築堡設屯據勝守禦復言番僧進馬多詐濫以錦綺制戰袍宜加裁抑固原州土達滿四等踞石城架砲山作亂出師討之滿四就擒居官二十年敝廬環堵怡然自得後秩滿歸省卒於家

曾用升字起東號九虛海陽人萬歷辛丑進士授行人升監察御史巡按河南人稱鐵面歷官尙寶司

少卿性嚴峻落落寡合家計蕭條二子貧不能自存

蕭龍字宜中潮陽人少穎異嘗從邑進士劉玘遊玘獨器異之天順己卯領鄉薦成化丙戌成進士任南京戶科給事中遇國家大計輒抗疏引論不避嫌怨憲宗時雷震奉天門上疏劾大臣不職權要借端傾陷成萬全邊士從遊者幾百人殷謙秦紘余子俊等相繼撫邊皆待以殊禮會恩詔恤諸戌臣夏官卿馬文升復爲辨誣復故職休致家居築草堂於西郭號湖山逸叟著湖山類稿

姚璦字宏瓚潮陽人天順壬午舉人授南京兵部司務歷職方員外武選郎中時中官蔣琮貪橫無狀璦劾之數其十罪忤旨逮繫三原王公恕疏救乃免宏治初董修益府勞瘁卒崇祀鄉賢

吳一貫字道夫海陽人成化辛丑進士知上高有聲擢御史巡按浙閩懲貪靖寇所至肅然以事與壽寧侯忤毆之折齒太后怒將置之死孝宗憐之獲免累官大理寺少卿後又以直言忤劉瑾謫嵩明州同知歷陞江西按察司行部至奉新病卒民哀之爲立祠

薛侃字尚謙揭陽人性至孝正德丁丑成進士卽以侍養歸師王守仁於贛州歸語兄助教俊俊大喜偕羣子姪宗鎧等往學焉自是王氏學盛行於嶺南世宗立侃授行人母訃隕絕五日始食粥嘉靖七年起故宮聞守仁歿爲位以哭時方議文廟祀典侃請祀陸九淵陳獻章九淵得報允已進司正十年秋疏言祖宗分封子弟必留一人京師司香有事居守或代行祭饗列聖相承莫之或改至正德初逆瑾懷貳始令就封乞稽舊典擇親藩賢者居京師慎選正人輔導以待他日皇嗣之生此宗

社大計帝方所嗣諱言之震怒立下獄廷鞫主使者南海彭澤爲吏部郎因議禮附張孚敬官至太常卿侃以疏草示澤澤與侃及少詹夏言同年生而言是時數忤孚敬澤默計儲副事觸帝諱必與大獄誣言同謀可禍也給侃藁示孚敬因報曰張公甚稱善當從中贊之孚敬乃先錄侃藁以進謂出於言請勿先發以待疏至帝許之侃猶豫澤頻趣之乃上拷掠備至侃獨自承累日獄不具澤挑使引言侃瞋目曰疏我自具趣我上者爾也言何豫會廷臣再鞫具得其實帝出孚敬密疏示廷臣

斥其伎罔令致仕侃爲民澤成大同侃至潞河遇
聖壽節焚香叩祝甚謹或報參政項喬曰小舟中
有民服而祝聖者喬曰必薛中離也跡之果然中
離者侃自號也歸家益力學從遊者百餘人卒年
六十所著有研幾錄圖書質疑諸書隆慶初復官
贈御史祀鄉賢

薛宗鎧字子修號東沅行人司正侃從子也嘉靖癸
未與從父僑同成進士授貴溪令補將樂調建陽
求朱子後復之以主祀事歲饑賑倉粟先發後聞
給由赴京拜禮科給事中以逋賦還原任至則民
潮州府志

卷二十八

人物

名臣七

珠蘭書屋

爭輸課更最再遷戶科左給事中劾冢宰汪鉉肆
奸植黨擅主威福且縱二子爲奸利乞立正厥辟
因曾翀疏內有誣臣杜口語帝怒罷鉉官而責宗
鎧等言不早執下鎮撫司鞫訊杖闕下死隆慶初
復宗鎧官贈太常少卿祀鄉賢

翁萬達字仁夫揭陽人嘉靖丙戌進士授戶部主事
遷郎中出守梧州咸寧侯仇鸞鎮兩廣縱部卒爲
虐萬達縛其尤橫者杖之聲績大著會朝議將討
安南擢萬達廣西副使晉叅政專辦安南事先是
莫登庸大言中國不能正土官弒逆罪安能問我

萬達請於總督張經先誅憑祥州土舍李寰等登庸始懼毛伯溫集兵進剿萬達上書言揖讓而告成功上策也懾之以不敢不從中策也芟夷絕滅終爲下策伯溫然之後獲安南諜者萬達解其縛厚遇遣之去休以天朝兵威登庸大懼乃詣伯溫降進兵部右侍郎總督宣大山西保定軍務謹諫候明賞罰每當防秋發卒乘障陰遣卒傾硃於油察離次者硃其處卒歸輒縛毋敢復離次者嚴殺降禁違輒抵死得降人撫之如所親以是益知敵情屢疏請修築邊牆內險外險極邊次邊言之甚

悉帝報可因發帑六十萬金大爲修築萬達精心計善鉤校牆堞近遠濠塹深廣曲盡其宜寇乃不敢輕犯萬達更事久帝深倚之獨言俺答貢事與帝左初俺答遣石天爵求貢巡撫龍大有執而殺之萬達言宏治前俺答歲入貢疆場稍寧自虞臺嶺之敗漸輕中國侵犯四十餘年石天爵事臣嘗痛邊臣失計帝不聽當是時曾銑方復河套萬達議曰河套本中國故壤成祖三犁王庭殘其部落舍黃河衛東勝後又撤東勝以就延綏套地遂淪失今欲一舉復之毋乃不易乎提軍深入山川之

險易途徑之迂直有無皆未悉知我馬出塞三日已疲彼騎一呼可集我軍數萬衆緩行持重則備益固疾行趨利則鎰重在後卽得小利歸師尙艱倘失嚮導全軍殆矣上不省寇犯滴水崖據險不退萬達督叅將姜應熊等馳赴順風鼓譟揚沙蔽天寇驚曰翁太師至矣乃夜遁諸將追擊連敗之帝大喜晉兵部尙書二十七年以父憂歸明年秋大同失事詔起萬達方病疽廬墓間疏請終制未達而俺答犯都城兵部尙書丁汝夔得罪遂卽以萬達代之萬達家嶺南距京師八千里倍道行四

十日抵近京時寇氛熾帝日夕俟萬達至遲之以問嚴嵩嵩不悅萬達言寇患在肘腋諸臣觀望帝遂用王邦瑞於兵部不數日萬達至具疏自明帝責其欺慢奪職聽別用仇鸞時爲大將軍寵方盛銜宿怨構讒言於帝萬達遂失眷降兵部右侍郎經畧紫荆諸關京察自陳乞終制帝疑其避事免歸卒年五十五萬達事親孝父歿負土成墳好談性命之學與歐陽德羅洪先唐順之善通古今操筆頃刻萬言爲人剛介坦直勇於任事履艱危意氣彌厲臨陣嘗身先士卒尤善御將士得其死力

隆慶中追謚襄毅節錄明史

林大有號東廬潮陽人嘉靖甲午舉於鄉戊戌成進士授戶部主事先後奉詔督河南山東江西漕運夙弊一清挽輸無滯差竣轉員外出守袁州嚴嵩招之不附其私人犯法直置於理嚴啣之改福建轉運同恤商便民餽遺悉却閩人立生祠於水口祀焉秩滿告歸國子監祭酒鄒守益作廉說以贈蕭端蒙字曰啓潮陽人嘉靖庚子鄉薦辛丑成進士選庶常著論二十餘萬言上重其才授山東道御史稽屯伍清畿內軍糾官邪悉報可命巡按貴州潮州府志

卷二十八

人物

名臣

十

珠蘭書屋

疏請置督臣增試額差旋途病予告歸上疏陳潮民疾苦請拓城除害等六事又陳時政十餘疏多切利弊不報癸丑秋俺答大舉入寇京師戒嚴起浙江道奉詔選延安綏德精兵入衛還賜金綺尋按江西病卒有同野集

蘇志仁號似峰海陽人嘉靖甲辰進士初授池州推官清直不阿時有稱國戚乘傳至者各官郊迎志仁曰不類此從吏收縛一訊輒伏衆服其明遷吏部稽勲主事歷考功文選出爲江西僉事提學福建致仕歸祀鄉賢

陳瑞龍字體乾潮陽人嘉靖庚戌進士授南京戶部主事歷任工部郎中修孝陵工成晉一級出爲興化守奉母抵郡民有訟開諭之令自悔悟橫暴者推鞠無所貸母卒治喪將歸倭寇大至客兵乘釁起孤城危急父老乞留督撫強之視事瑞龍墨衰從戎募丁壯協水兵授以方畧直擣賊營萬弩俱發賊敗斬首六百餘級生擒一百三十人奪還男婦數百人積勞疽發背卒百姓爲巷哭子惇臨另有傳

林大春字井丹潮陽人少嗜史漢工古文辭弱冠舉

潮州府志

卷二十八

人物

名臣

十一

珠蘭書屋

於鄉登嘉靖庚戌進士時嚴分宜慕其名招致之不應後除行人兩使秦中泉南藩王及大臣以金帛餽却之晉戶部主事部例疏奏以郎官四人主稿凡大春所擬藁皆當上意奉命使遼東齎帑二十五萬給軍還隨衆謁分宜於直廬嵩喜曰林君何相見之晚也衆以爲與分宜有舊視所投刺不稱門下惟具銜而已轉員外出爲湖廣江防僉事丁內艱歸服闋補河南睢陳僉事執法不避權貴置故相高拱私人於法拱銜之以大計調後二年拱免相起蒼梧僉事改浙江提學奉詔選貢士皆

得人太宰楊公博廉其能晉秩副使浙江提學如故迨高拱復相言官希意劾春命題斷裂經義遂罷歸其後拱以罪去張居正當國雅與春善及江陵居父喪人言第得一誅辭通顯可立致大春笑而遣之嘗語人曰宰相須用讀書人江陵負才欠學故動多躁妄必及於難後果敗家居十八年杜門著書於桑梓利病必備悉達之官招收都混跡萑苻當道欲遣師屠之春爲力阻全活萬餘人卒年六十六著井丹詩文集十八卷祀鄉賢弟有聲隆慶庚午舉人歷福州判官有惠政

潮州府志

卷二十八 人物 名臣 十一

珠蘭書屋

郭敬賢字桂溪海陽人嘉靖癸丑科進士選庶常忤嚴分宜謫通州判官時論偉之尋陞工科給事抗疏極陳時政累官至禮部都給事年三十八卒於官崇祀鄉賢

陳惇臨字彥莊潮陽人隆慶丁卯鄉薦萬歷丙戌成進士謁選得閩縣令下車裁冗費罷魚餉懲惡雪冤治行第一拜留臺御史疏論人才先搜隱逸用直臣又條奏救荒六事上諭可出授河北僉事設社倉置學田尋晉叅議移轄湖南調廣西會思明府土目陸佑叛中丞檄惇臨集土漢官兵六萬人

進剿移師壺關外士民感不殺競降賊勢瓦解驅
兵直入陸佑自刎死斬首一千餘級生擒二百餘
人奪獲牛馬器仗論功晉副使整飭左江兵備時
交南款關入貢上命惇臨督師驗實統諸司抵鎮
南關召陪臣鄭松宣布朝廷威德交夷帖服獻黃
金寶玩槩却之交人爲建生祠以染瘴氣病卒贈
太僕寺少卿祀鄉賢

周光鎬潮陽人字國雍號耿西隆慶辛未進士授寧
波推官有聲從銓部郎守順慶萬歷丙戌西南不
靖叩笮陸梁中丞徐固知其能疏請監軍光鎬輕

騎飛渡傳呼所至賊衆驚匿抵越雋部署諸軍三
路並進所向無前直搗賊巢擒獲賊酋安守大小
三十餘戰斬首四千有奇壬辰寧夏哮拜告變全
陝震動朝廷以臨鞏爲彝夏咽喉擢臬司移駐賀
蘭值歲饑帥屬賑濟活者萬計諸酋亦帖然無敢
乘釁構禍洎寧夏平城郭殘破奸人反側非聲望
大僚不足以資彈壓晉鎬僉都駐節寧夏先撫綏
修城堡簡卒乘備芻糧規模一新尋晉階大理寺
卿以老乞休著明農山堂集年八十一卒以子篤
昇貴贈通議大夫

唐伯元字仁卿澄海人萬歷甲戌進士授萬年令調太和秩滿陞南京戶部主事旋晉郎中進石經大學上留覽言官詆其指斥新學謫判海州升保定推官擢禮部主事疏奏請端大本引世廟遺詔語極剴切上爲感動辛卯典試湖廣晉尙寶丞丁艱起補吏部員外郎歷文選司郎中時上方切責選司伯元悉心釐剔銓政肅清尋疏乞歸踰年卒年五十八著醉經樓集禮編易註太乙堂采芳亭諸稿白沙文編二程語類祀鄉賢

林熙春字志和海陽人萬歷癸未進士初授巴陵令潮州府志

卷二十八 人物

名臣

古

珠蘭書屋

清浮糧豁差役以丙艱歸起補將樂縣修學宮建楊龜山祠行取擢戶科給事中歷禮兵二科至工科都給事多所建白如止東封減織造停採回青皆於國體有關萬歷乙未軍政事起上怒不測一時斥言官三十四人閣臣疏救不允臺中具疏不敢上熙春毅然偕同官上之其疏曰陛下怒言官緘默斥逐三十餘人臣等不勝悚懼今御史馬經綸慷慨陳言竊意必溫旨褒嘉顧亦從貶斥是以建言罪耶抑以不言罪耶臣等不能解也前所罪者旣以不言之故今所罪者又以敢言之故臣等

安所適從哉陛下誠以不言爲溺職則臣等不難
進憂危之苦詞誠以直言爲忤旨則臣等不難效
暗默之成習但恐廟堂之上皆諂佞取容非君上
之福也臣等富貴榮辱之念豈與人殊然寧爲此
不爲彼者母亦沐二百餘年養士之恩不負君父
且不負此生耳陛下奈何深怒痛疾而折辱至是
哉上益怒降調家居一十六年未嘗隻字入長安
丙午從茶陵州判官量移賀縣庚申泰昌元年恩
詔起廢以南儀曹轉光祿少卿歷升太僕少卿右
通政太僕寺卿太常寺卿大理寺卿值玉田兵變

叱馭而入布告朝廷威德衆皆投戈其在問正奉
敕總理京邊馬政一月之內簡乘三萬餘騎合武
弁而殿最之無不克當大理案牘山積熙春力爲
釐剔弊絕風清如甦牽累省繁文有約民約官十
六款皆永久可行時璫禍已萌天啓四年甲子六
疏乞休晉戶部左侍郎予告歸一月而璫禍作矣
居鄉爲桑梓陳利病甚切如爭監稅減里役倡建
鳳凰臺三元塏修玉簡塏築砲臺於海口濟三利
溪修龍頭東集等橋文廟賢良祠捐田爲諸生科
費善事不可備紀年八十以壽終贈尚書諡忠宣

著賜閒草賜還草賜傳草城南書莊草

子益封任太常簿升上林苑監正性端嚴約身如寒素官上林諭資格應得部郎不屈禮東廠卒爲所抑年六十一卒於京邸

林銘球字彤石號紫濤先世爲閩之漳浦人第後始籍普寧辛酉補海豐諸生中天啓甲子舉人忌者以異籍攻之除名懷宗卽位伏闕上書准附福建會試崇正戊辰成進士授行人司行人奉使諭祭唐藩又命冊封岷藩擢江西道御史上疏言治兵固急保民宜先優詔答之申救薊遼總督洪承疇

免逮薦黃道周起廢籍召用巡視十庫劾惜薪司侵蝕物料中貴咸懼繼視西城所轄西山多勦戚莊田怙勢虐民彈治不少假按宣大特敕大閱却邊帥餽遺劾總督梁某失律移按湖廣時楚地流寇充斥奉敕監軍護陵平湖南劇賊呂瘦子恩予紀錄岷藩建國武岡州長史吳從哲等凌轢大吏朘削民膏球列狀以聞岷藩反訐禍且不測事下楚藩據實回奏得旨再巡一年已卯復命岷藩嗾督臣稽之撫入吏議降河南臬幕旋以護陵功起補光祿寺監事轉大理寺右寺副因母老乞歸越

二年甲申國難作潮地寇起澄揭相繼陷乃集普
邑士庶練鄉兵守望相助賊引去以積勞成疾年
六十卒著西臺疏草宣雲按楚奏疏按楚文告監
軍紀畧谷雲草浮湘草怡雲堂集

辜朝薦字端敬號在公海陽人少穎慧一覽成誦七
歲能屬文天啓甲子舉人崇正戊辰進士除桐城
令癸酉分校南闈行取擢山東道御史旋改禮科
給事中劾首輔溫體仁文公震孟時在官坊作詩
壯之請假歸省假滿補禮科奉命冊封粵西靖江
王已卯秋督催三楚練餉一百二十餘萬不滿四

月報竣丁外艱啜粥深墨負土營葬服闋補禮科
左給事中以督餉稱旨賜宴癸未充會試同考官
得士二十一人居諫垣十年有疏草四卷甲申以
禮科給事中督江左右粵東西四省糧餉值北都
失守聞變痛哭歸家著桑浦行吟乙酉澄寇倡亂
決隄海邑盡爲澤國里人屢堵屢潰薦捐資命其
子之潤築以灰石至今海邑東南數都咸食其利
棄家而隱飄然世外里居幾三十年壽七十妻謝
氏寇逼郡城出私橐二千餘金募丁壯死守令曰
斬緣城賊一級者予銀一錠丁壯奮勇殺賊賊引